

- wo gy mit Reinken maken den vorbunt
 unde wolden wesen twe lyke gesellen.
 dat mot ik dessen heren vortellen,
 wente Reinke myn òm in winters nôt
 170 umme Ysegrims willen vilnâ was dôt.
 wente it geschach, dat ên quam gevaren,
 de hadde grote vische up ener karen.
 Ysegrim hadde geren der vische gehalet,
 men he hadde nicht, dârmit se worden betalet.
 175 he brachte mynen òm in de nôt,
 umme synen willen gink he liggen vor dôt
 recht in den wech unde stunt eventûr.
 merket, worden em ôk de vische sûr?
 do jenne mit der kare gevaren quam
 180 unde mynen òm dârsulvest vornam,
 hastigen tōch he syn swert unde snel,
 unde mēde myneme ome to rucken ên vel.
 men he rogede sik nicht klēn noch grôt;
 do mēde de, dat he were dôt,
 185 he leiden up de kâr unde dachten to villen.
 dit wagede he al dorch Ysegrims willen!
 do he do vōrtan begunde to varen,
 werp Reinke etlike vische van der karen.
 Ysegrim van vērne na quam
 190 unde desse vische al to sik nam.
 Reinke sprank wedder van der karen,
 ên en luste do nicht lenk to varen;
 he hadde ôk gērne der vische begert,
 men Ysegrim hadde se al vortêrt,
 195 he hadde getten, dat he wolde barsten,
 unde moste darumme gân tom arsten.
 do Ysegrim der graden nicht en mochte,
 der sulven he em ên weinich brochte.
 Ik segget *ju ôk* by der truwe myn:
 200 Reinke wuste êns ên geslachtet vet swyn,
 wôr dat hangede an eneme wyme.
 dit sêde he up loven Ysegrime.
 dâr gingen se hēn up beder eventûr,
 men Reinken wart dat swyn gans sûr:
 205 he moste krupen tom venster in
 unde werp dat nedder up beder gewin.
 dâr weren ôk hunde grôt unde stark,
 mit den hadde Reinke syn vulle werk;
 se ruckeden em to degen syn gude vel,
 210 de wyle at Ysegrim up dat swyn alhêl.
 mit groter nôt he nouwe wech quam
 unde gink dâr he Ysegrim vornam,
 he klagede syne nôt unde eschede syn dêl.
 ja, sprach Ysegrim, ên gût morsêl
 215 hebbe ik dy vorwaret, holt unde et,